

四庫全書

史部

欽定四庫全書

吳郡志卷二十二

宋 范成大 撰

人物

顧琛字弘瑋吳縣人和曾孫祖履之父倓並為司徒左
曹掾琛謹確不浮華孝建初為吳郡太守以起義功
封永新侯三年竟陵王誕反遣客陸延稔齎書板琛
及子弟官琛執其使斬之遣二子送延稔首啓聞後
復為吳郡太守琛雖貴達吳音不變

顧覲之字偉仁為山陰令御繁以約晝日垂簾門階閒
寂自宋世為山陰務簡而事理莫能尚也後為吳郡
太守幸臣戴法興權傾人主覲之未嘗低意或嫌其
風節過峻覲之曰辛毗有云孫劉不過使吾不為三
公耳卒官湘州刺史諡曰簡子覲之常謂命有定分
非智力所移唯應恭已守道信天任運而聞者不達
妄求徵倖徒虧雅道無關得喪乃以其意命姪愿作
定命論焉

顧歡字景怡郡人聰敏好學母亡廬墓次遂隱遁不仕
開館聚徒受業者嘗近百人太祖輔政召為揚州
主簿遣中使迎歡及踐阼乃至歡稱山谷臣顧歡上
表曰湯武得勢師道則祚延秦項忽道任勢則身戮
夫天門開闔自古有之四氣相新絺裘代進今火澤
易位三靈改憲天樹明德對時育物是以窮谷愚夫
敢露蟲管謹刪撰老氏獻治綱一卷伏願稽古百王
不以芻蕘棄言不以人微廢道臣自足雲霞不須祿

養陛下既遠見尋求敢不盡言言既盡矣請從此退
武帝永明元年詔徵為太學博士同郡顧黯為散騎
郎俱不就

顧黯字長孺有隱操與顧歡俱召俱不赴

顧子喬吳人梁武陵王府叅軍事以儒術知名子烜烜
梁臨賀王記室亦以儒術知名子野王仕陳

顧憲之字士思覲之孫性尤清直宋元徽中為建康令
為政甚得人和故都下飲酒淳旨者輒號為顧建康

言其清且美焉仕齊為衡陽內史出公祿葬疫死者
王賔歎曰顧衡陽之化至矣憲之雖累經宰郡資無
儋石及歸環堵不免饑寒梁天監中卒遺令勿設靈
筵朔望祥忌權安小牀勿用牲牢設香燈下素饌而
已所著文數十篇

顧協字正禮吳人晉司空和六世孫年數歲外從祖光
祿大夫張永嘗攜之遊武丘山問欲何戲協曰正欲
枕石漱流初舉秀才沈約覽其策歎曰江左以來未

有斯作為湘東王記室叅軍有詔舉士湘東王表薦
曰協行稱閭里學無文義服膺墳索雅量邃遠安貧
專靜奉公抗直年幾六十室無妻子臣欲言於官人
申其屈滯協苦執靜退立志難奪可謂東南之遺寶
昔孔愉表韓纘之子庾亮薦翟陽之德臣雖未齒二
臣協實無慙兩士

見文苑
英華

累遷常侍卒官無衾以斂

武帝為舉哀諡溫子協初為廷尉正冬服單薄寺卿
蔡法度欲解襦與之憚其清嚴不敢發口自丁艱憂

終身布衣蔬食少時將聘舅息女未成昏而協母亡
免喪後不復娶年六十餘此女猶未他適協義而迎
之晚雖判合卒無嗣息博極羣書撰異姓苑五卷瑣
語十卷文集十卷並行於世

顧野王字希馮烜子七歲知五經大指九歲能屬文十
歲隨父之建安作建安地記長則徧觀經史精記默
識天文地理著龜占候蟲篆字無所不通又善丹青
時人稱絕侯景之亂歸本郡召募鄉黨隨義軍援都

體素清羸裁長六尺又居喪過毀殆不勝哀及伏戈
被甲陳君臣之義逆順之理抗辭作色莫不壯之陳
天嘉中卒官光祿卿知五禮事野王少以篤學至性
知名在物無過辭失色視其容貌似不能言其厲精
力行皆人所莫及撰玉篇輿地志符瑞圖顧氏譜傳
分野樞要續洞冥記玄象表又撰通史要畧國史紀
傳未就而卒

顧彪吳人以春秋左氏授朱子奢名于世

顧嗣胤吳人父覽隋祕書學士胤永徽中修國史撰
太宗實錄又論次國史有勞封餘杭縣男終司文郎
中子琛武后時拜相

顧少連字夷仲吳人擢第補登封主簿邑有虎孽少連
命塞陷竄移文嶽神虎不為害德宗幸奉天徒步詣
謁授翰林學士中書舍人閱十年以謹密稱裴延齡
方橫無敢忤者少連酒酣挺笏謂曰段秀實笏擊賊
臣今吾笏將擊姦臣奮且前元友直勸解之改京兆

尹東都留守表禁苑及汝開田募耕以便民閱武力
利鎧仗號良吏卒封本縣男贈右僕射諡曰敬始少
連攜少子師閔奔行在有詔同止翰林院車駕還授
同州叅軍韋夏卿撰少連神道碑謂顧氏復徙吳會
自晉司空和洎梁給事中耀至少連十三代矣又云
少連父望慕梁伯鸞於陵仲子安貧履道不辱其身
該通六經高貫百氏究天人之際盡性命之端觀夏
卿所述望蓋耆儒隱君子也又云子師閔以拔萃甲

科次師安等三人非少子也碑見文苑英華

顧禧字景繁祖沂字歸聖知龔州父彥成字子英兩浙運使皆有賢名禧雖受世賞不仕居光福山中閉戶讀誦博極墳典所著書甚富注蘇文忠公詩尤詳紹興間郡以遺逸薦閑居五十年不出名重鄉里

顧襄字公甫郡人太學上舍生名聲籍甚熙寧九年登第召為太學正卒歸葬虎丘

戴顓字仲若父逵隱遯有高名顓以父不仕復修其業

自桐廬徙居吳下士人共為築室聚石引泉植林
開澗少時繁密有若自然乃述莊周大旨著逍遙論
禮記中庸篇三吳守將及郡內衣冠要其同遊野澤
堪行便去不為矯介宋國初建辟台並不就文帝每
欲見之嘗謂黃門侍郎張敷曰吾東巡之日當宴戴
公山下也

陳遺郡人宋初為郡吏母好食鎗底飯遺在役常帶一
囊每煮食輒剝其焦以貽母後孫恩亂聚得數斗恒

帶自隨及敗逃竄多有餓死遺因此得活母晝夜泣涕目為失明耳無所聞遺還入戶再拜號咽母豁然

即明

南史

何求字子有其先廬江人何氏過江自司空充並葬吳西山為吳人求除中書郎不拜隱居波若寺足不踰戶人莫見其面宋明帝崩出奔國哀除永嘉太守求時寄住南澗寺不肯詣臺乞於寺拜受見許一夕忽乘小船逃歸吳隱虎丘山齊拜太中大夫又不就弟

點仕梁

杜京產郡人少恬靜閉意榮宦郡命主簿州辟從事皆
稱疾去除奉朝請亦不就永明十年孔稚珪陸澄虞
棕沈約等表薦之曰竊見吳郡杜京產潔靜為心謙
虛成性通和發於天挺敏達表於自然學遍玄儒博
通史子流連文藝沈吟道奧奉初之朝掛冠辭世遁
捨家業隱於太平葺宇窮巖採芝幽澗耦耕自足新
歌有餘確爾不羣淡然寡欲麻衣藿食二十餘載雖

古之志士何以加之謂宜釋巾幽谷結組登朝則巖谷含歡薜蘿起抃矣不報建武初徵為員外散騎侍郎京產曰莊生持釣豈為白璧所回辭疾不就

陳景尚吳人善講誦道釋中皆不可及製靈書經大行

於世梁邵陵王甚重之

抱朴子

何點字子皙求之弟居喪幾至滅性真素通美博通羣書善談論無所與屈世以點為孝隱士弟胤為小隱士士大夫多慕從之兄求卒於虎丘點菜食不飲酒

三年腰帶減半宋齊之間累詔不就嘗患渴累歲不
愈後在吳中石佛寺講所晝寢夢一道人形貌非常
授丸一掬夢中服之自此而差時人以為淳德所感
弟脩

何脩字子季仕齊為中書令領臨海巴陵王師拜表解
職不待報輒去二兄求點並棲隱求先卒至是脩又
隱世號點為大山脩為小山亦曰東山兄弟號何氏
三高脩家世少壽惟祖尚之至七十二脩年登祖壽

以上世皆葬吳西山乃移還吳至吳居虎丘山西寺
講經論學僧復隨之東境守宰經途者莫不畢至戒
殺有虞人逐鹿鹿徑來趨膚伏而不動又有異鳥如
鶴紅色集講堂馴狎如家禽年八十六

孫修道吳人梁中散大夫以雅素知名子瑒仕陳

皇侃郡人青州刺史皇象九世孫少好學師事賀瑒精
力專門盡通其業尤明三禮孝經論語仕梁國子助
教召入壽光殿說禮記義武帝善之加員外散騎侍

郎侃性至孝日誦孝經二十篇丁母憂還鄉卒所撰
論語禮記義見重於世

孫瑒字德璉吳人父修道瑒倜儻好謀畧博涉經史仕
梁以軍功封富陽侯陳初王琳立蕭莊於郢召瑒都
督郢州刺史周將乘虛攻之瑒兵不滿千人乘城拒
守遂盡有中流之地奉表歸陳封定襄侯召為領軍
將軍文帝謂曰昔朱買臣願為本郡卿豈有意乎改
吳郡太守給鼓吹一部改鎮公安為鄰境所憚累遷

五兵尚書卒諡曰桓瑒事親以孝聞於諸弟甚篤睦
性通泰有財散之親友家庭穿築極林泉之致歌鐘
舞女當世罕儔嘗於山齋設講肆集玄儒之士冬夏
資奉之處已率易不以名位驕物巧思過人為起部
尚書軍國器械多所創立後主數幸其宅賦詩述勲
德及卒尚書令江總為之銘誌後主又題銘後四十
字遣左戶尚書蔡徵就宅宣勅鐫之畧曰天長路遠
歲久靈多功名未勒此意如何時以為榮瑒二十子

次子訓頗知名仕至高唐太守

杜之偉郡人陳武帝命以經授衡陽獻王昌

孫超之全景文皆郡人微時嘗與沈攸之共乘小船出
都有人止而相之曰君三人皆當至方伯不驗便是
相書誤耳後超之果為廣州刺史景文字弘達齊永
明中卒於光祿大夫

潘徽字伯彥郡人性聰敏受禮於鄭灼受毛詩於施公
受書於張冲講莊老於張譏並通大義尤精三史善

屬文能持論秦孝王俊令徽於馬上為賦行一驛而
成復令為萬字文煬帝時為京兆郡博士

褚輝字高明郡人以禮學稱於江南煬帝徵天下儒士
集內史省講論輝博辯無能屈者擢太學博士撰禮
疏百卷

徐孝穎吳人祖麟梁侍中石陽侯父樞陳尚書起部郎
孝穎勤學多覽善屬文性至孝丁母憂三年縗經不
離身經冬不御綿纈形體骨立柱而能起每哭臨哀

聲徹於郡邑聞者亦為隕涕嘗在園中晝卧見人盜菜徐轉身向裏恐盜見之其仁行謙退皆此類也仕

煬帝為學士校書郎

大業雜記

朱子奢吳人從鄉人顧彪授經善文辭正觀初持節使海外平高麗百濟新羅三國之憾子奢有儀觀夷人尊畏之累遷諫議大夫唐初太廟止四室子奢始發七廟之議帝欲觀起居記錄子奢曰陛下所舉無過事雖見無嫌然以此開後世史官之禍可懼也史官

全身畏死則悠悠千載尚有聞乎子奢性樂易能劇談以經誼緣飾每侍宴帝令論難羣臣恩禮甚篤

史德義崑山人咸亨初隱居虎丘山以琴書自適或騎牛帶瓢出入郊郭東市號為逸人高宗聞其名召赴洛陽尋稱疾歸公卿皆賦詩餞別德義亦以詩留贈其文甚美天授初江南道宣勞使周興表薦則天徵赴都詔曰蘇州隱士史德義志尚虛玄素履真確謙冲彰於里閭孝友表於閨庭固辭徵辟長往嚴陵之

瀨多謝簪裾高蹈愚公之谷風操可知啓沃攸佇特
宜優獎委以諫曹授諫議大夫後放歸丘壑

朱佐日郡人兩登制科三為御史子承慶年十六登秀
才科代濟其美天后嘗吟詩曰白日依山盡黃河入
海流欲窮千里目更上一層樓問是誰作李嶠對曰
御史朱佐日詩也賜綵百疋轉侍御史承慶嘗為昭
陵挽詞入高等由是父子齊名

翰林
盛事

陶岷崑山人文學自許生知八音通曉不謀宦遊富田

業擇人不欺者悉付之身泛江湖遍遊煙水往往數
歲不歸製三舟一自載一置賓客一貯飲饌與客孟
彥深孟雲卿焦遂共載逢佳山水必窮其勝開元末
名聞朝廷經過郡邑靡不招之峴不肯來自謂麋鹿
野人非王公上客亦有不招而自詣者吳越之士號
為水仙常慕謝康樂之為人言終當樂死山水浪迹
垂三十年後遊襄陽西塞歸老於吳

歸崇敬字正禮吳縣人治禮家學多識容典舉博通墳

典科第一詔舉才可宰百里者復策高等大厯初以
倉部郎中使新羅遇風濤舟幾壞衆謀易單舸崇敬不
肯獨濟風訖息使還囊橐惟衣服東夷傳其清德遷
翰林學士左散騎常侍餘姚郡公表歸上冢寵賜繒
帛儒生以為榮卒贈僕射諡曰宣論撰數十篇

歸登字冲之崇敬子事繼母篤孝舉孝廉高第又策賢
良性溫恕嘗慕陸象先為人貞元初為右拾遺裴延
齡得幸右補闕熊軌易疏論之以示登登動容曰願

竄吾名雷霆之下君難獨處同列有所諫正輒聯名
無所回諱轉起居舍人凡十五年退然遠權勢終不
以淹晚槩懷順宗為太子登父子侍讀憲宗問政所
先知帝睿而果于斷勸順納諫爭內外傳為讜言進
工部尚書封長洲縣男諡曰憲

歸融字章之登之子開成初拜御史中丞湖南觀察使
盧周仁取羨錢億萬進京師劾奏請還所進代貧民
租入厯兵部尚書封晉陵郡公會昌後儒臣少朝廷

禮典多本融議

沈既濟吳人經學該明有良史才召拜史館修撰議則
天皇后進非以德請省其紀位禮部員外郎

沈傳師字子言既濟子材行有餘能治春秋工書有楷
法舉進士禮部侍郎權德輿於門生中推為顏子復
登制科累拜尚書右丞湖南江西觀察使吏治嚴明
吏不敢罔以廉靖聞入為吏部侍郎卒贈尚書傳師
性夷粹無競更二鎮十年無書賄入權家初拜官宰

相欲以姻私託幕府者傅師拒曰誠爾願罷所授故其僚佐如李景讓蕭真杜牧極當時選治家不威嚴閨門自化兄弟子姓屬無親疏衣服飲食如一問餉姻家故人帑無儲錢鬻宅以葬

沈詢字誠之傅師子能文辭累遷昭義節度使治尚簡易人皆便安卒贈兵部尚書左散騎常侍

徐岱字處仁蘇州人本農家子於學無不通辯論明銳座人常屈終給事中史館修撰

于公異吳人進士擢第李晟表為書記破朱泚公異為
露布曰臣既肅清宮禁祇奉寢園鐘簴不移廟貌如
故帝覽泣下曰誰為之辭或以公異對帝咨歎一再
然仕不振而卒

丁公著字平子吳人幼喪母七歲見鄰媪抱子哀感不
食請於父緒願絕粒學老子道稍長父勉敕就學舉
明經授校書郎不滿秩輒去侍養父喪負土作冢貌
力癯瘠見者憂其死孝觀察使表上至行詔刺史存

問賜束帛旌表其間後為皇太子諸王侍讀著太子
諸王訓十篇穆宗立未聽政召居禁中條詢治理且
許以相公著陳遜牢切辭疾求外所至以清靜聞終
太常卿公著清約守道每進一官輒憂見顏間四十
喪妻終身不畜妾及卒天下惜之

吳郡志卷二十二

欽定四庫全書

吳郡志卷二十三

宋 范成大 撰

人物

顧雍字元歎吳人曾祖奉潁川太守蔡伯喈嘗避怨於
吳雍從學琴書伯喈歎異之故與伯喈同名而字元
歎從宦有治迹累遷領尚書令封侯拜侯還寺而家
人不知不飲酒寡言語舉動時當為孫權所敬憚代
孫邵為相選用文武各隨能所任心無適莫訪民間

及政職所宜輒密以聞若見納用則歸之於上不用終不宣泄相十九年卒子裕襲侯雍弟徽雍族人悌

雍子邵穆

裕一名

邵子譚承

顧徽字子歎雍之弟以才辯為孫權腹心權欲揣曹操意遷徽輔義都尉以往操具問境內消息徽應對婉順拜巴東太守欲大用之會卒

吳書

顧悌字子通雍族人以孝悌廉正聞於鄉黨孫權時為將軍言辭切直朝廷憚之悌父向歷四縣今年老致

仕每得父書灑掃設几筵舒書其上拜跪讀之父終
飲漿不入口五日以不見父喪常畫壁作棺柩象設
神座於下對之哭泣服未闋而卒

顧邵字孝則博覽書傳好樂人倫風聲流聞遠近稱之
與舅陸績齊名為郡守舉善以教風化盛行留心下
士雖役伍微賤皆拔而友之世稱知人子譚承

顧穆宜都太守子榮仕晉

顧譚字子默邵之子弱冠為太子四友清識絕倫獨見

推重自謝景羊微之徒悉在譚下赤烏中為左節度
每省簿書未嘗下籌徒屈指心計盡發疑謬薛綜為
選曹尚書固讓譚曰譚心精體密貫道達微才照人
物德允眾望孫權待之甚隆遂平尚書事遭讒徙交
州著新言二十篇

顧承字子直譚之弟孫權召見之賜丞相雍書曰貴孫
子直令聞休休至與相見過於所聞為君嘉之拜吳
郡西部都尉出平山越入為侍中終奮威將軍

顧禺字孟著雍諸孫而榮兄子也少有名望為散騎侍郎

顧榮字彥先吳人為南土著姓祖雍父穆榮機神朗悟弱冠仕吳吳平與陸機兄弟同入洛時號三俊陳敏反南渡江榮起兵攻敏敏率萬餘人出榮以羽扇麾之皆潰永嘉初召拜侍中禍難方作輕舟而還元帝鎮江東以為軍司謀畫皆諮焉朝野推敬之卒官散騎常侍安東軍司嘉興伯贈侍中驃騎將軍開府儀

同三司諡曰元榮經德體道謀猷洪遠忠正之節在
困彌厲族弟衆

顧衆字長始父祕交州刺史衆有文武才幹為鄱陽太
守王敦作逆以軍期召衆聲色甚厲衆不為動容陸
玩曰所謂剛亦不吐柔亦不茹仲山甫何以加之蘇
峻反衆還吳潛圖義舉吳中人士同時響應與賊戰
破之以功封鄱陽縣伯遷僕射卒諡曰靖第三子會
中軍諮議叅軍時稱美士族子和

顧和字君孝衆族子曾祖容荊州刺史祖相臨海太守
和總角便有清操族叔榮曰此吾家騏驎興吾宗者
王導謂和珪璋特達機警有鋒不徒東南之美實為
海內之俊累遷中丞僕射多所獻納不阿權臣卒官
儀同三司諡曰穆子淳厯黃門侍郎左尉將軍曾孫
琛仕宋

張允吳人輕財重士名顯州郡為孫權東曹掾子溫字
惠恕少修節操容貌奇偉顧雍以為當今無輩孫權

聞之曰如是則張允不死矣召見文辭占對觀者傾
竦權改容加禮甚見信重以輔義中郎將使蜀蜀人
甚貴其才權嫌其聲名太盛會暨豔諧行遂併幽之
駱統表理曰溫弘雅之素英秀之德文章之采論議
之辨卓犖冠羣煒曄曜世人未有及之者也若忍威
烈宥賢才以純大業固明朝之休光也權終不納溫
病卒二弟祗白亦有才名與溫俱廢

張儼字子節吳人弱冠知名博聞多識拜大鴻臚寶鼎

初使于晉磨厲鋒鏑思不辱命既至晉賈充裴秀荀
勉等欲傲以所不知皆不能屈羊祜何禎並結縞帶
之好道病卒

張訓字叔方德量淵懿清虛淡泊善文辭為海昏令甚
有惠化

張純字元基少厲操行學博才秀拜郎中為廣德令治
有異績擢太子輔義都尉又文士傳曰純少有清才
與同郡張儼朱異俱童少往見驃騎將軍朱據據聞

三人才名欲試之曰今三賢屈顧老鄙相聞渴甚矣
其為吾各賦一物然後乃坐夫騷衷以迅驟為功鷹
隼以輕疾為妙何必積思皆隨目立成據大歡悅純
賦席曰席以冬設簟為夏施揖遜而坐君子攸宜儼
賦犬曰守則有威出則有獲韓盧宋鵲書名竹帛異
賦弩曰南岳之榦種山之銅應機命中獲隼高墉

張禕少有孝行恭帝為琅邪王以為郎中令及帝踐祚
劉裕以禕帝故吏素所親信封藥酒一甕付禕使醢

帝禕既受命而歎曰鳩君而求生何面目視息世間哉不如死乃自飲之卒子暢仕宋

張憑字長宗郡人有志氣為鄉閭所稱舉孝廉劉惔見之清言彌日遂言之於簡文帝召與語歎曰張憑勃宰為理窟官至御史中丞

張澄吳人晉光祿大夫當葬父郭璞為占葬地曰葬某處年過百歲位至三司而子孫不蕃某處年減半位止鄉校而子孫貴顯澄乃葬其劣處位果止光祿年

六十四至曾孫裕遂昌子彭祖

張彭祖廣州刺史子敞侍御史度支尚書桓玄篡位以
事忤玄敞表獻忠款事玄為吳郡太守一云為吳國
內史子裕仕宋敞子孫至宋齊之後益昌為吳大家
張翰字季鷹吳人父儼吳大鴻臚翰有清才善屬文而
縱任不拘時人號為江東步兵賀循赴命入洛經吳
閭門於船中彈琴翰初不識便同載去齊王冏辟為
大司馬東曹掾冏時執權翰謂同郡顧榮曰天下紛

紛禍難未已吾本山林間人無望於時子善以明智
自防榮執其手曰吾亦與子採南山蕨飲三江水耳
翰因見秋風起乃思吳中菰菜蓴羹鱸魚膾曰人生
貴得適志何能羈宦數千里以要名爵乎遂命駕歸
著首丘賦俄而冏敗人皆謂之見機翰任心自適不
求當世或謂曰卿縱適一時獨不為身後名耶答曰
使我有身後名不如即時一杯酒人貴其曠達性至
孝遭母憂哀毀過禮年五十七卒

沈珩字仲山郡人少綜經藝長春秋內外傳有智謀能專對孫權使使魏文帝引珩談語終日隨事響應無所屈還吳封永安鄉侯官至少府弟峻

吳書

沈峻字敬山有名譽而性儉吝張溫使蜀與峻別峻入內良久出語溫曰向擇一端布欲以送卿而無麤麤者溫嘉其無隱又常經太湖岸上使從者取鹽米已而恨多勅令還減之尋亦自愧曰此吾天性也

笑林

朱據字子範吳人有姿貌膂力又能論難才兼文武孫

權以為可繼呂蒙張溫使領兵屯尚公主拜左將軍
封雲陽侯謙虛接士輕財好施祿賜雖豐常不足用
遭二宮交惡據擁護太子義形於色以死守之遂左
遷終於新都郡丞孫亮時二子熊損各復領兵熊子
宣襲爵尚公主至驃騎將軍

朱桓字休穆郡人討平山賊有功遷濡須督拒魏曹仁
眾寡不敵桓謂諸將曰勝負在將不在眾寡諸君聞
曹仁用兵行師孰與桓邪雖曹丕自來尚不足憂部

兵進擊仁敗走拜前將軍封侯桓輕財貴義性彊識
與人一面數十年不忘部曲萬口妻子盡識之愛養
吏士瞻護六親俸祿產業皆與共分其沒也吏士男
女無不號慕家無餘財官周其喪事子異

朱異字季文以父任除郎累遷至鎮南將軍大破魏軍
後假節為大都督救壽春圍不解還軍為孫琳所枉
害

卜靜字玄風與顧邵陸通張訓等齊名終剡令

暨豔字子休郡人張溫引為選曹尚書性狷厲好為清議是時郎曹混淆多非其人豔臧否區別賢愚異貫遂為浸潤所譖

韋曜字弘嗣郡人少好學能屬文孫亮時為太史令孫皓時遷中書僕射皓欲為父和作紀曜執以和不登帝位宜名為傳由此漸怒皓酒後以嘲弄公卿為歡曜但言論經議為不承詔收曜付獄徙其家零陵

徐原字德淵慷慨有才志忠壯好直言為呂岱所薦為

侍御史岱有得失原輒諫諍原死岱哭之甚哀曰德淵岱之益友今不幸岱復於何聞過談者美之

孫拯郡人為陸機司馬孟超直入機麾下奪囚拯勸機殺之不能用及機為成都王穎所害又收其弟雲龍及拯皆下獄考掠拯兩踝骨見終不變辭吏民知拯義烈謂曰二陸之枉誰不知之君可不愛身乎拯仰天歎曰陸君兄弟世之奇才吾衆知愛今既不能救其死忍復從而誣之乎遂同被害拯門人費慈宰意

詣獄明拯冤拯譬遣之曰吾義不負二陸死自吾分
卿何為爾二人曰君既不負二陸僕又安可負君亦
被害

吾彥字士則吳人有文武才幹身長八尺手格猛獸膂
力絕羣陸抗奇其勇畧用為建平太守時王濬將伐
吳造船於蜀彥覺之輒為鐵鎖橫斷江路晉師攻之
不能剋乃退舍禮之吳亡始歸晉為交州刺史二十
餘年清身率下威恩宣著南州寧靖人為大長秋

蔡洪字叔開郡人有才名時王政陵遲官才失實君子多退而窮處洪作孤奮論與王沈釋時論同意讀者莫不歎息仕為松滋令

朱誕郡人陳敏之亂豪傑多見維繫惟誕與顧循不預其事

吳震郡人學行清修老而未調華譚薦之為著作佐郎范平郡人其先銍侯馥避王莽亂適吳因家焉平研覽墳索該通百氏詔謚文貞先生三子爽咸泉並以儒

學至大官泉子蔚家世好學關內侯蔚子文才亦知名



吳郡志卷二十三

欽定四庫全書

史部

吳郡志卷二十四至

詳校官監察御史_臣沈孫璉

檢討_臣德生覆勘

總校官編修_臣倉聖脈

校對官助教_臣卜維吉

謄錄監生_臣陸潮愈

欽定四庫全書

吳郡志卷二十四

宋 范成大 撰

人物

張裕字茂度敞之子為廣州刺史綏靜百越嶺外安之
解職還家徵為都官固辭以疾就加金章紫綬茂度
內足於財自絕人事經始本縣之華山為居止優遊
野澤如此者七年為會稽太守有吏能職事甚理卒
於官守謚曰恭子子演位太子中舍人弟鏡永辯岱

俱知名時謂張氏五龍

張鏡裕之次子少與顏延之鄰居延之常談義飲酒喧
呼鏡靜默無言聲後鏡與客談延之從籬邊聞之取
胡牀坐聽辭義清深延之心服謂客曰彼有人焉由
是不復酣叫仕至新安太守

張永字景雲裕之第三子涉獵書史能為文章善隸書
騎射雜藝觸類兼善又有巧思大為文帝所知紙墨
皆自營造上每得永表啟輒執玩咨嗟自歎供御者

不及授揚威將軍都督諸將經略河南後為青冀二
州刺史統諸將討薛安都封孝昌縣侯改吳郡太守
遷南兗州刺史加都督永少便驅馳志在宣力其為
將帥能與士卒同甘苦年雖老志氣不衰子瓌仕齊
張岱字景山裕之幼子仕為東遷令殷冲為吳興太守
謂人曰張東遷棲遲下邑名器方顯終當大至歷臨
海豫章晉安三王府諮議自謂一心可以事百君我
為政端平待物以禮悔吝之事無由而及徙益州刺

史益土安其政齊建元初為吳郡太守高帝知岱歷任清直至郡未幾手敕曰大郡任重未欲回換但總戎務殷宜須望實今用卿為護軍加給事中岱拜竟詔以家為府武帝即位復為吳興太守更以寬恕著名遷南兗州刺史未拜卒謚貞

張邵字茂宗裕之弟初為晉琅邪內史王誕龍驤府功曹桓玄徙誕於廣州親故咸離棄之唯邵情禮彌謹流涕追送時寇亂年饑又資饋其妻子武帝以邵勤

練憂公補州主簿邵悉心政事精力絕人帝受命以
佐命功封臨沮伯卒謚曰簡遺命祭以菜果葦席為
輜車諸子從焉子敷

張敷字景胤生而母亡年數歲問之便有感慕之色求
母遺物唯得一扇緘錄之每感思輒開筭流涕性整
肅風韻甚高好讀玄書兼屬文論少有盛名帝見而
愛之與高士宗少文談繫象少文曰吾道東矣於是
名價日重宋武帝召見奇之曰真千里駒也仕至黃

門侍郎後軍司徒左長史父亡十餘日始進水漿葬畢不進鹽菜毀瘠成疾未朞而卒孝武旌其孝追贈侍中名其所居曰孝張里

張暢字少微祿之子少與從兄敷演鏡齊名為後進之秀元嘉中累遷安北長史魏太武南侵至彭城暢於城上與魏尚書李孝伯語吐屬如流音韻詳雅風儀華潤魏人相視歎息改為南譙王義宣長史元凶弑逆義宣舉兵暢哀容俯仰蔭映當時見者皆願為盡

命事平封夷道縣侯義宣有異圖暢遣門生荀僧寶
下都因顏竣陳義宣釁狀義宣敗暢見原轉侍中會
稽太守卒謚曰宣

張緒字思曼演之子少知名清簡寡欲從伯敷及叔父
鏡並貴異之鏡語人曰此兒今之樂廣也謝敷云是
我輩人宋明帝每見緒輒歎其清談袁粲謂有正始
遺風出為吳郡太守齊建元初為中書令素望甚重
太祖深加敬異王儉嘗云北士中覓張緒過江未有

人不知陳仲弓黃叔度能過否長於易言精理奧見
宗一時吐納風流聽者皆忘饑疲見者肅然如在宗
廟雖終日與居莫能測焉益州獻蜀柳狀若絲縷武
帝植之靈和殿前賞玩咨嗟曰此楊柳風流可愛似
張緒當年時每朝見世祖目送之謂王儉曰緒以位
尊我我以德貴緒其見賞如此緒口不言利有財輒
散之清言端坐或竟日無食門生見緒饑為之辦飧
然未嘗求也死之日無宅以殯遺命作蘆葭輜車引

樞上置杯水香火不設祭焉謚簡子子充仕齊

張瓌字逸祖永之子仕宋不欲前兄瑋處祿免官不拜
遭永喪還吳昇明元年劉秉有異圖弟遐為吳郡潛
相影響齊高帝密令瓌取遐諸張世有豪氣瓌與叔
恕領兵十八人入郡斬之郡內莫敢動者太祖告張
沖曰瓌以百口一擲出手得盧矣即授吳郡守錫以
嘉名封義成縣侯郡人顧暭陸閑少年未知名瓌引
為綱紀後並立名皆以為知人瓌以既有國秩不取

郡俸高帝敕上庫別藏其俸以表其清鬱林之廢朝
臣參承明帝環託脚疾不至見朝廷多難屢啟還吳
梁天監中卒弟稷子率並仕梁

張沖字思約數弟秉之子母戴顯女有儀範張氏內取
則焉沖少有至性仕齊為青冀二州刺史沖父初卒
遺命曰祭我必以鄉土所產無用牲物沖在鎮四時
還吳取果菜流涕薦焉後遷郢州封定襄侯梁武帝
起兵手書喻意又遣辯士說之沖確然不回明年梁

兵圍之沖固守不出病將死屬府僚以誠節言終而卒贈散騎常侍護軍將軍

張融字思光暢之子弱冠有名神明俊出機辯如流同郡道士陸脩靜以白鷺羽塵尾扇遺之曰此既異物以奉異人仕宋為封溪令路經嶂嶮獠賊執融將殺食之融神色不動方作洛生詠賊異之而不害也融風止詭越見者驚異聚觀齊高帝素愛融常笑曰此人不可無一不可有二善草書常自美其能帝曰卿

書有骨力但恨無二王法答曰非恨臣無二王法亦恨二王無臣法義宣之亂官軍欲殺融父暢張興世以袍覆暢而坐之得免興世卒融著高履負土成墳興世子欣時坐罪當死融又啟竟陵王欲代欣時死王義之建武中病卒遺令建白旛無旒不設祭三千買棺無製新衾有玉海集行於世張氏前有敷演鏡暢後有充融卷稷弟寶積

張寶積何點謂為保家之主永元中乘腰輿謁蕭穎胄

舉動自若穎冑問何至之晚答曰自本朝危亂四海橫流既不能為比干之死實未忍為微子之去是以至晚穎冑深善之後仕御史中丞

梁張稷字公喬瓌之弟幼有至性所生母喪常設神坐出告反面如事生州里謂之淳孝父母沒廬墓六年性疎率明悟有才略仕齊衛尉卿東昏之難為梁武佐命然常愧之徐道角作亂見害俸祿皆頒親故家無餘財與族兄充融卷並知名時號四張子嶧姪率

率弟盾

張卷字令遠稷族兄少以和理著稱能清言仕至都官尚書

張嶠字四山稷子少篤孝年三十餘猶斑衣受稷杖方雅有志操能清言感家禍終身蔬食布衣不執刀刃不聽音樂仕梁湘東王長史王為之筮得節卦謂嶠曰卿後當東入為郡恐不得終其天年嶠曰貴得其所耳為吳興太守侯景圍建鄴遣弟伊率兵赴援賊

將劉神茂遣使說嶧嶧斬其使景遣侯子鑒擊嶧嶧
軍敗釋戎服坐聽事賊臨以刃不屈執送景將舍之
嶧曰速死為幸與子孫同遇害者十餘人景欲存其
一子嶧曰吾一門已在鬼錄不就爾處求恩於是皆
死元帝追贈開府儀同三司謚忠貞子弟輩亦知名
張率字士簡瓌之子性寬雅十二能屬文每日限為文
一篇至年十六凡作二千餘篇陸少玄家有書萬卷
率盡讀之齊建武中舉秀才沈約目為南金梁武帝

時為文德待詔帝見其文曰相如工而不敏枚臯速而不工卿可謂兼二子之全矣又謂曰卿東南物望名家奇才若復以禮律為意便是宰相才祕書丞天下清官東南望曹未有為之者今以相處為卿定名譽尋以為祕書丞出為新安太守率嗜酒於家務尤忘懷自少屬文七略及藝文志所載詩賦今亡其文者並補作之所著文衡十五卷文集四十卷行於世張盾字士宣率之弟以謹重稱為湘東王記室出監富

陽令廓然獨處無所用心身死之日家無遺財唯有文集并書千餘卷酒米數甕而已

張種字士苗永從孫祖辯宋大司農父略太子中庶子種少恬靜居處雅正傍無造請時人語曰宋稱敷演梁則卷充清虛學尚種有其風仕梁始豐令母卒毀瘠過甚又迫凶荒未葬服雖畢居家飲食常若在喪景平初王僧辯以聞起為中從事并為具葬禮葬訖方即吉陳武帝受禪累遷中書令種沈深虛靜識量

宏博時以為宰相之器卒贈特進謚元子種雖歷顯位家產屢空終日晏然不以為病

張稜仕梁種之弟清靜有識度位司徒左長史光祿大夫

張充字延符緒之子少好逸遊嘗臂鷹牽狗吳西郭中年三十便脩改多所該通尤明老易能清言與從叔稷俱有令譽仕齊歷尚書殿中郎王儉用事方聚親賓充敝巾葛帔至便求酒言論放逸一坐盡傾遷義

興太守為政清淨入為侍中梁武帝兵至建鄴東昏
遇禍百官集西鐘下召充充不至歷梁吏部尚書居
選以平允稱遷尚書僕射頃之為吳郡太守卒謚穆
子

張繹字士和郡人學道講經理致深密詞端華辯當時
所宗梁武帝雅相欽賞時陶隱居著法檢論明釋老
二教繹往復討論甚有條理隱居嘉焉專心道法居
貧守約善八體書別製雲篆作茅山南洞碑甚工

太平

張昭字德明弟乾字元明吳人昭幼至孝父爍病消渴嗜鮮魚昭結網捕魚以供弟乾聰敏好學亦有至性父卒兄弟並不衣綿不食鹽醋日食一升麥屑粥每感慟必歐血父服未終母陸氏又卒兄弟毀瘠骨立家貧未得大葬布衣蔬食十有餘年衡陽王伯信臨郡舉乾孝廉固辭兄弟因毀成疾昭一目失明乾亦中冷苦癖年未五十並終于家嗣息俱絕

張仲字叔玄郡人仕陳左中郎將好覃思經典撰春秋義略喪服孝經論語義前漢音義官至漢王侍讀

張後胤字嗣宗崑山人祖僧紹梁零陵太守父沖陳國子博士入隋為漢王諒并州博士後胤以學行禪其家以經授唐太宗封新野縣公終散騎常侍謚曰康張承休後嗣孫張說撰其墓志云後嗣之子小師小師生承休承休希言篤行去華崇實非法不由非禮不動精於理物敏於從政歷朝議大夫上柱國恒州刺史

史說之文曰昌門一分暉我諸侯蓋居昌門云

張鎰字季權後嗣五世孫父齊丘朔方節度使東都留守鎰貞獻鎰累官殿中侍御史將救盧樅死白其母曰樅免而鎰貶默則負官貶則為太夫人憂母曰兒無累於道吾所安遂執正其罪坐貶撫州司戶建中二年拜中書侍郎平章事盧杞忌鎰剛直擢之出為鳳翔隴右節度使帝幸奉天鎰罄家資將自獻行在營將李楚琳嘗事朱泚夜率其黨作亂遂遇害史臣曰

鎡暴忠王室為賊姦所乘以歿其身蓋福善禍淫之訓有時而撓要躬可殞而名與岱崧等矣

張從師郡人張說撰其墓志云河南府法曹參軍有唐逸士吳郡張從師沖和純粹辯博閎達卓犖好古儻蕩逸羣秀才高第歷官五政忘懷樂道如浮雲無心野鶴獨立上元二年終葬虎邱西原子惟儉惟靜弱歲皆精左氏穀梁春秋弟從申時為祕書省正字從師祖損之隋侍御史水部郎損之生浹碩學麗藻名

動京師從師之父也從申自有時名書法甚高

張旭吳人草書嗜酒每大醉呼叫狂走乃下筆或以頭濡墨而書既醒自視以為神不可復得也世呼張顛初仕為常熟尉有老人陳牒求判宿昔又来旭怒其煩老人曰觀公筆蹟奇妙欲以藏家爾旭因問所藏盡出其父書旭視之天下奇筆也自是盡其法後人論書歐虞褚陸皆有異論至旭無非短者傳其法惟崔邈顏真卿文宗時詔以李白歌詩裴旻劍舞張旭

草書為三絕

張僅字幾道與里人顧棠字叔思皆客於王荊公公作

三經義二人與焉僅至著作佐郎卒方子通作挽詩

極哀楚誦者為出涕吳人因目子通為方挽詩

吳郡聲名

顧與張龍門當日共升堂青衫始見登華省丹旄俄聞入故鄉含淚孤兒生面垢斷腸慈母滿頭霜可憐十載人間事不及南柯一夢長

吳郡志卷二十四

欽定四庫全書

吳郡志卷二十五

宋 范成大 撰

人物

楊收字藏之，父遺直客死，姑蘇收七歲而孤，遂居吳處，喪若成人。母長孫親授經，十三通大義，善屬文，所賦輒就。吳人號神童。里人多造門觀賦詩，至壓敗其藩。懿宗時，以中書侍郎同中書門下平章事，子鉅散騎常侍，鑄戶部尚書。

徐修矩吳人仕為恩王府記室參軍奕世才賢承家介
潔守世書萬卷優游自適有潮田五萬步草屋十數
間不復出仕皮日休嘗就借書讀之與任晦同時日
休與陸龜蒙作二游詩謂修矩與任晦也

任晦吳人仕為涇縣尉退居里中有深林曲沼危亭幽
砌池中又為島嶼脩篁嘉木掩映隈奧晦資高放寡
合好奇樂異喜文學名理之士得顧辟疆舊圃以居

云

松陵集

孫發吳人舉百篇科皮日休贈以詩云百篇空體喧金
屋一日官銜下玉除陸龜蒙亦云直應天授與詩情
百詠惟消一日成其見推當時如此後未有繼之者
皮光業字文通父日休為蘇州從事光業生於蘇十歲
能屬文錢武肅王鏐辟以為屬吳越國建以為相教
令儀注多其所定美容儀善談論若神仙中人
吳越
備史
殷宅字昌從少負志氣博學善屬文弱冠遊太學籍甚公
卿間天寶末知天下將亂乃趣裝東歸侍母居吳郡

吳中士大夫得從之遊者鄉黨以為榮採訪使李希言辟為從事奏授試崑山尉不就子侑遂顯官

馮宿集

吳仁璧大順中及第喜屬文精星學及黃白術初學於廬山道士數年其師曰能罷峯學仙乎仁璧固陳求名之志道士曰一第取之拾芥耳但他年從宦勿干英雄仁璧既成名錢武肅王待以客禮訪以天文固辭非所知欲辟幕職又以詩辭及秦國夫人薨武肅具禮幣請為志又不從遂為錢氏所害其女亦善星

學仁璧被繫女仰瞻而泣曰文星失位大人其不免

乎

備史
遺事

溫訥蘇州人吳武忠王楊行密時為大將劉威幕客行
密卒威為帥府所忌或譖之於徐溫溫將害之訥說
威曰公受謗雖深反本無狀若輕舟入覲則嫌疑皆
亡矣威從之溫果待威甚恭威得遠鎮訥之力也

司馬福郡人始隸吳越王水軍淮人圍姑蘇置柵環城
內外阻絕王遣救兵至莫知城中音問福能水中行

總帥因遣入城淮人設網縣銅鈴纖鱗過之必覺福以巨竹觸網淮人聞鈴聲亟舉網網舉而得度或浮水上則戴萍荇而行因得入城既而復出凡在水中三日及救兵至與城中弓矢相應淮人以為神軍中皆服福奇才進官都指揮使吳越王城吳江置軍鎮命福主之許老於職至國初不絕

備史遺事

丁偃蘇州進士試過英延講藝詩云白虎前芳掩金華舊事輕天心非不寤垂意在蒼生有古詩諷諫之體

偃是歲奏名甚高御前下第自是二十年始及第

溫公

詩話

鄭夷甫郡人少登科有美才嘉祐中監高郵軍稅遇一術士能推人死期無不驗推夷甫命不過三十五歲感歎不堪人有勸其讀老莊以自廣者久之潤州金山一僧端坐與人談笑間化去夷甫聞之喟然歎息既不得壽得如此僧復何憾哉乃從佛者授楞嚴經往還吳中歲餘忽有所見曰生死之理我知之矣遂釋

然故懷無復芥蒂後調封州判官預知死日先期旬
日作書與交遊親戚訣及次敘家事備盡至期沐浴
更衣公舍外有小園面溪一亭夷甫至其間親督人
洒掃及焚香揮手指畫之間屹然立化家人奔出呼
已僵立亭亭如植木一手猶作指畫之狀郡守而下
少時皆至士民觀者如堵牆明日乃斂高郵崔伯易
為墓誌略敘其事

墨客揮
犀筆談

謝濤字濟之淳化三年進士幼奇敏講學陽山澄照寺

吳令羅處約長洲令王禹偁皆與定交處約謂禹偁
曰濟之揚摧天人吾曹敵也由此聲名益顯真宗即
位銳意人物內出濤等二十四人治狀會京東強寇
起召知曹州歷三司判官兩浙轉運使侍御史直昭
文館知越州權西京留司御史臺就拜祕書監朝廷
嘉其恬退擢太子賓客其為侍御史清靜端介百辟
望其風采及分務悉屏去外累不復親筆硯曰佚我
以老日閱舊史一卷以代賓話弟炎有文名與盧植

齊名時謂之盧謝

謝絳字希深濤子祥符八年進士召試館閣校勘上疏
言國家當以土德王天下又言真宗當配上帝議不
合河決滑州又言災異衆多宜深自引咎損膳於朝
罷不急之役省無名之斂以休息天下又請罷內降
詔令皆由中書樞密院而後施行因進聖治五箴遷
知制誥出知鄧州卒子景初景溫景平景回

龔識給事中慎儀之子端拱元年進士大中祥符間翰

林學士李宗諤薦擢監察御史遷殿中侍御史兼左
巡使本朝襲唐制御史不專言職至是始擇學術醇
正操履端方可綱紀朝廷者俾入臺言事識始被選
後以目疾求退除檢校司封郎中平江軍節度使本
朝吳士登科者始於識今府學先達題名以識為首
識之後有宗元等列於後其家至今居崑山黃姑猶
藏其登第時金花榜帖乃用塗金黃紙闊三寸長四
寸許大書姓名下有兩知舉花押又用白紙作大帖如

藥帖狀貯金花帖於中外亦書姓名二字蓋以此報
其人也自唐以榜帖相傳而世少見其制故附於此
丁謂字謂之長洲人少與孫何善袖文謁王禹偁大驚
重之以為自唐韓愈柳宗元後二百年始有此作世
謂之孫丁淳化三年進士甲科累遷夔州路轉運使
蠻酋為寇謂諭以禍福蠻感泣作誓刻石立境上五
年不得代詔舉自代者乃入為三司鹽鐵副使大中
祥符五年叅知政事九年請外為平江軍節度使知

昇州天禧初復叅政改樞密使代寇準拜中書門下
平章事加司空晉國公仁宗即位進司徒侍中為山
陵使授太子少保分司西京又貶崖州司戶叅軍在
崖五年累徙光州授祕書監致仕卒年七十二謂機
敏有智謀文字累數千百言經覽輒誦善談笑為詩
至圖畫博奕音律無不洞曉嘗建鄉郡節鉞以至宰
相國朝吳人至相位者始於謂又嘗為鄉里請於朝
特免丁錢鄉人至今德之祠於萬壽寺

許洞字洞天吳縣人父仲容太子洗馬洞疎雋幼習弓矢擊刺長折節勵學精左氏傳咸平三年第進士為雄武軍推官詣府白事有倅踞坐不起即移書責知州馬知節知節怒劾之除名歸吳所居常植一竹以表特操吳人至今詠之曰許洞門前一竿竹日以酣飲嘗從民坊貰酒大有所負一日忽書壁作酒歌數百言人爭往觀其酤數倍景德中獻所撰虎鈴經應籌策科報罷封太山祀汾陰獻三大禮賦卒於烏江

主簿

劉少逸年十一文辭精敏有老成體其師潘閭搗以見
長洲令王元之吳縣令羅思純以所作贊二令二令
名重當時疑所贊假手未之信因試之與之聯句略
不淹思思純曰無風燈焰直少逸曰有月竹陰寒元
之曰一回酒渴思吞海少逸曰幾度詩狂欲上天凡
數十聯皆敏妙二公驚異聞于朝賜進士及第官止

尚書員外郎

續歸田錄

祝庶幾郡人通象緯之學累赴鄉舉不中第景德中求試所習以為司天靈臺郎

徐祐字受天擢第為吏以清白稱慶歷中屏居吳下日涉園廬以自適終左官貲外郎年七十五

鄭戩字天休吳人居皋橋九歲而孤長客京師師事楊億天聖三年進士第三累官龍圖閣學士知開封府戩強敏善聽決假貸細民繩治豪宗大姓流姦吏馮士元于海島執政盛度程琳皆坐黜朝議畏其皦核

康定元年同知樞密院出知杭州發丁數萬開闢西
湖民賴之歷陝西四路都總管經略安撫招討使行
邊至鎮戎軍天寒與將佐置酒會塞塵起有報西戎
至戢云此必川兵按邊回耳非賊騎已而果然以資
政殿大學士知并州時契丹與元昊交惡邊奏互上
獨戢不以聞上問戢對戎狄相攻中國不足憂仁宗
嘗曰戢氣質英豪朕欲以為相故屢試於外尋為宣徽
北院使檢校太保奉國軍節度使卒年六十三贈太

尉謚文肅

吳感字應之以文詞知名天聖二年省試第一九年中書判拔萃科仕至殿中丞子純文行亦高鄉人目曰吳先生

元絳字厚之居帶城橋天聖五年進士屢典大藩以文章政譽名一時神宗欲選翰苑之才王荊公曰有真翰林學士恐不能用耳遂自外召入翰林未幾叅知政事事詳在國史後以太子少保致仕還吳中與程

公闢諸公為九老會鄉人號其居曰袞繡坊卒年七十餘有玉堂集三十卷

程師孟字公闢郡人其高祖思為錢氏營田使遂居吳師孟居南園側號畫錦坊景祐元年舉進士累遷判三班院給事中判將作都水監歷知楚遂洪福廣越青州為政簡而嚴剝煩制劇才力有餘罪非死者不以屬有司獄每為空寬猛得中所至人悅性樂易純質言無隱情喜為詩效白樂天而尤簡直至老不改

吳語累官光祿大夫致仕年七十八樂圃朱先生伯
原少許可言師益為政則曰雖韋丹治豫章孔戣帥
嶺南常衮化七閩無以加也天下以為才御史師米
芾亦云廣平公以文學登科以政事躋顯以言語出
疆以恬退告老足之所及功利蔚起云有詩集二十
卷奏議十五卷

盧秉父草本德清人舉神童慶厯之後累歷監司有聲
請郡自劾神宗嘉其恬退未幾告老累進太子賓客

官制行累改通議大夫退居於吳年八十二今盧提
刑橋因其宅以名其家遂為吳人秉皇祐元年進士
元豐中為發運使父革退老於吳秉每歲上計必請
還鄉省侍後帥涇原懇辭歸養手詔慰勉時以為榮
龔宗元字會之慎儀之孫幼穎悟絕人讀書虎丘為鄉
貢首選天聖五年擢第范文正公謂之曰君器業清
修他日必為令器謹勿因人以進宗元後登朝未嘗
遊公卿門文正之教也終都官貲外郎宗元始以都

官分司南京謝事取白居易詩作中隱堂語在園亭
條子程孫況皆繼登科

龔程字信民剛正自守不怵於禍福力學排異端家不
設佛老像祭祀不焚紙錢讀書南峰攻苦食淡遂博
極羣書鄉人號有脚書厨熙寧六年第進士終桐廬
令子況

龔況字濬之崇寧五年進士入館以學術文章與蘇過
在朝俱知名時號龔蘇用宗元中隱故事自號起隱

子終祠部員外郎有起隱集三十卷

孫載字積中崑山人曾祖漢英仕錢氏為蘇州崑山鎮防遏使遂為縣人載治平二年第進士歷廣東河北淮西使者知海沂婺亳州治務大體時號循吏以嘗薦元祐黨人遂丐歸一日徧謁先壠及嘗與往來者呼妻子與設問日早晏盥手焚香而逝年七十五丁隲吳人元祐中嘗為正言五上章論何正臣治獄殘酷巧詆刻深甚於羅織黨錮事載國史

侍其沔字國紀上世自高密徙吳學貫穿經傳與人交
如淡薄遇其急奮義以往不避艱險五舉禮部退為
鄉先生治平三年沒門人弟子相與議其治行謚曰
夷晦先生滕元發志其墓云士生斯世有進取出力
得時行道功烈被於民者有行義修潔退而講學為
一鄉之善士者斯二者用舍不同要皆天下之強立
君子也善士蓋指沔其慕尚之如此

秦希甫字辨之郡人元豐二年進士元符中為陝西轉

運判官奏王瞻王厚取邈川青唐府庫物因此致變
又言河州至湟州道路險阨往者如赴死所湟州本
溫溪心故地當求溫氏之後立為屏輔皆在可棄崇
寧初黨論起言者以棄地為罪降官入黨籍

葉清臣字道卿長洲人父參嘗守郡謝事因居天慶觀

之東有賢德名

事具七檜
堂條下

清臣天聖二年舉進士第

二簽書蘇州觀察判官累遷修起居注三班鹽鐵院
上疏論地震熒惑犯南斗因訟范仲淹余靖以言事

被黜天下斷舌行將二年人主當深自咎責詳延忠直敢言之士出為兩浙運使豪右田據上游水不得泄民不敢爭清臣請疏盤龍匯滬瀆港入于海民賴其利擢三司使編前後詔勅使吏不敢欺遷為翰林侍讀學士歷江寧邵澶青永興河陽諸郡清臣幼敏異好學善屬文天資爽邁遇事敢行數上書論天下事其陳九議十要五利皆當世可行者有文集一百六十卷

錢象先字資元郡人中進士高第宰相呂夷簡薦其經
行為國子監直講歷大理少卿三司判官河北江東
轉運使天章閣待制龍圖閣直學士官尚書刑部侍
郎又歷知河中河南府許潁陳蔡亳州以吏部侍郎
致仕象先長於經術仁宗留神經執象先以古學進
勉間有顧問依經以對因以諷論政事時務有啟迪
獻納之益留侍經筵前後十五年又通刑名之學所
尚詳平又以犯敕者重犯令者輕請移敕文入于令

者甚衆又省去許捕之條百餘其持法近厚如此修
敕成例賜勲爵獨賜三品服仁宗謂輔臣曰象先以
孝聞有母八十歲以此慰其母心熙寧九年卒年八
十一

滕甫字元發避高魯王諱以字為名更字達道本東陽
人范文正公父之甥教以為文文正為郡安定胡先
生翼之亦居郡中甫來從學廷試兩為第三孫沔一
見曰後當為賢將累遷御史中丞翰林學士歷開封

真定府鄆許秦定青揚鄧等州終龍圖閣學士謚章
敏甫慷慨豪邁不拘小節近世名將無及者葬陽山
子孫遂為吳人

蔣堂字希魯本宜興人徙于蘇祥符五年進士任侍御
史論禁中火宜責躬修德不必歸咎宮人郭皇后廢
極論不可出為淮南發運使薦部吏二百負累遷樞
密直學士歷知應天河中府洪杭益蘇州後十二年

再守蘇遂謝事以禮部侍郎致仕家於靈芝坊

詳見園亭

門

堂為人修潔遇事不少屈好學工文詞延譽晚進至老不倦卒年七十五有吳門集二十卷其絕筆詩云歸來深隱太湖濱天與扶持百歲身雖是浮雲隔雙闕丹心愛戴在君親忠厚之氣終始如此

陳郢隱居里中以琴書自樂丁晉公甥也欲薦以官拒之續圖經并其弟之奇謂之兩高士父殿中丞質亦以德行著稱鄉里

陳之奇字虞卿曾祖贊明事錢氏為中吳軍節度推官

所謂丁陳范謝四長者之奇天聖中禮部試第四御
試不得第居鄉里十年無仕進意母丁晉公之妹晉
公欲官之之奇兄弟每力辭而勉使復應舉不得已
復起得及第李瑋尚秦國大長公主詔舉經術仁義
者為隴西郡王宅教授數月告歸即致仕郡留其奏
不可時年未五十未幾詔賜金錢復起之卒不起終
太常博士之奇孝於親約於身信於朋友篤行好學
知道心泊如不為聲利所遷其退歸與鄉人同憂樂

赴人之急至於州縣無所避州縣以之奇至誠亦不
為疑平居靜默與人言忠孝立身疊疊不倦人莫不
以為君子每出乘羸駒里巷小人見之必斂然曰此
吾陳君子也四方賢士大夫至吳必問陳君所在爭
欲一見之王岐公聞其喪曰吾嘗與陳君相從於閭
門之下觀其言出入仁義之際真君子哉乃為誌其
墓而題曰太常博士致仕陳君子之墓云

方惟深字子通其先自莆陽徙吳為吳下鄉先生文學

行義與樂圃朱長文同為一世所宗事具程俱所撰墓銘其略曰子通幼有稱鄉貢為第一試禮部不第即棄去吳下有田一廛與其弟躬出入耕穫間則讀書至於黃帝老莊之書養生為壽者之說及西方別傳皆得其大指平居視之猶木雞也及其論議古今道理窮覈至到確然莫能移常以雅道自娛一篇出人爭傳誦王安石以為精詣警絕元白皮陸有不到處以韋布之士閉關陋巷而孝友清介之風隱然稱

東南有司舉貢籍以年格應補軍州助教者就賜敕牒袍笏於其家得興化軍助教拜受唯謹初年四十無子其弟有子以為吾先人有後足矣即屏居於外預知死期期至不亂喪葬皆有治命云

楊懿孺字彞甫其先自浦城徙長洲以行義隱處與方子通同時號吳中二老事具程俱所撰墓銘略云吳郡有二老焉或仕或不仕皆隱者也居城之東北曰方公居城之東南曰楊公即懿孺也懿孺少孤力學

言行相顧朝無夕儲讀書哦詩泊如也神夷氣昌未嘗有饑寒憂雖閭里不盡知其貧崇寧二年特奏名後調南昌主簿居一年忽載妻子歸吳下且告老以承奉郎致仕平居直心自信不知世間有傾巧事自未仕及老于家不入州縣不事鄉里請謁間一過所親厚歲不過數四雖嘗出而仕人猶謂隱者

吳郡志卷二十五

欽定四庫全書

吳郡志卷二十六

宋 范成大 撰

人物

范仲淹字希文事具歐陽文忠公所撰神道碑及國史傳其略云皇祐四年五月甲子資政殿學士尚書戶部侍郎汝南文正公薨於徐州五代之際世家蘇州生二歲而孤母再適長山朱氏仍其姓始名說既長知其家世感泣去之南都入學五年大通六經為文

章論說必本仁義舉進士禮部選第一中乙科始歸
迎其母以養少有大節其於富貴貧賤毀譽懼戚不
一動其心而慨然有志於天下常自誦曰士當先天
下之憂而憂後天下之樂而樂也其事上遇人一以
自信不擇利害為趨捨天聖中為祕閣校理以言事
忤章獻太后旨通判河中府召拜右司諫上疏請還
政天子及郭皇后廢率諫官御史伏閣諫又揖宰相
留百官廷爭不能得貶知睦州徙蘇州州地瀕震澤

田多水募將手疏五河導積水入海興作未就徙明
州轉運使言仲淹治水有緒願留以畢其役詔復知
蘇州召還拜天章閣待制益論時政闕失知開封府
治有聲取古今治亂安危為上開說又為百官圖以
獻宰相呂夷簡怒交論上前落職知饒州徙潤越州
趙元昊反河西為陝西經略安撫副使又為環慶路
經略安撫招討使兵馬都部署為將務持重不急近
功小利待將吏必使畏法而愛已所得賜賚皆以上

意分賜諸將諸番質子縱其出入無一人逝者番酋
來見召之卧内屏人徹衛與語不疑居二歲士勇邊
實恩信大洽乃決策謀取橫山復靈武而元昊數遣
使稱臣請和上亦召之歸慶歷三年為樞密副使數
月為參知政事每進見必以太平責之再賜手詔趣
使條天下事又開天章閣召見賜坐授以紙筆使疏
於前退而條列時所宜先者十數事上之僥倖之人
皆不便因相與騰口而嫉之者亦幸外有言喜為之

佐佑會邊奏有警卽請行乃以為河東陝西宣撫使
即拜資政殿學士知邠州兼陝西四路安撫使其知
政事纔一歲而罷有司悉奏罷前所施行而復其故
言者遂以危事中之賴上察其忠不聽是時夏人已
稱臣因以疾請鄧州守鄧三歲求知杭州又徙青州
公益病又求知潁州肩輿至徐遂不起年六十有四
贈兵部尚書謚文正御篆其碑曰褒賢之碑為人外
和內剛樂善汎愛喪其母時尚貧終身非賓客食不

重肉臨財好施意豁如也及退而視其私妻子僅給
衣食其為政所至民多立祠畫像其行已臨事自山
林處士里閭田里之人外至夷狄莫不知其名字而

樂道其事焉長子純佑少有大志蚤卒純仁純禮純

粹皆名世

閩瀨撰文正公真贊云英英如神屹屹如山仁義道德溢於顏間大忠阜夔元功方

召以贊中樞以導清廟佑我仁祖格于皇天是肅是
虔不傾不騫維慶有祠邦民瞻思慶山可夷茲堂巍
巍

范純仁字堯夫仲淹子第皇祐元年進士父薨始出仕

治平中為侍御史議濮王典禮不當命出房闥通判
安州由是名震天下後知諫院言王安石驟更法度
恐失人心作尚書解以進前後上言以休兵省事節
用富民進君子退小人愛人材仲公論為急崇聚斂
事苛刻親讒佞任偏聽為戒大則廷論小則疏述反
復激切無所諱避復出補外元豐八年召為給事中
明年同知樞密院事陳禦備西戎之策事俱施行元
祐三年拜尚書右僕射自為執政務以博大開上意

忠篤草士風救蘇軾韓維王覲等極言前世朋黨之禍吳處厚箋蔡確詩以聞朝廷欲貶之死地純仁獨曰此路自丁晉公後荆棘已七八十年不可自吾輩開之奏乞薄確罪亦出知潁昌府踰年復相於事無所回隱同列病之哲宗於大臣中獨注意純仁問人材法度悉以實對章子厚用事復出知潁昌累貶永州徽宗即政即日走中貴人湖南致上及皇太后命勞賜甚寵所啟皆國家大體蓋將屬以重任以中太

乙宮使召以目疾辭上每對輔臣以不見純仁為恨
年七十五薨賜世濟忠直四字為墓隧碑首謚曰忠
宣純仁性夷易寬簡嘗曰吾平生好學得之忠恕二
字厯事四朝無間言自為布衣至宰相廉儉如一

范純禮字彛叟仲淹子元祐中為給事中凡所封駁正
名分立紀綱皆國體之大者論張耒不當不候參召
令供職一時聳動知開封府一切以寬革前政刻深
之弊中丞蘇轍攻右丞王存去將用轍代存純禮曰

蘇章不避嫌此必不放過數日徙純禮刑部侍郎轍
方拜元符三年拜右丞以年老力辭上謂安燾曰范
純禮作執政不應引年況精力康強卿等以國家圖
任老成之意勉之救陳次升以言得罪乞以嘉言用
江公望留王覲解上官均鄒浩之言為理當從之乞
罷京城猪羊圈解山陵明器之煩費曾布榻前云人
皆言財用不足天下何憂無錢純禮進曰天下告窘
戶部無料錢支藏庫空竭無如今日布誑陛下建中

靖國元年知潁昌府尋除端明殿學士崇寧初累責
單州年七十六純禮居二府布衾絕袍不為表襮沽
名譽食飲不擇其鮮不役婢妾中年即清居端坐全
真容物不爭而立朝端方乃不可犯人以劉寬卓茂
方之

范純粹字德孺文正公第五子元豐中歷鄜延陝西轉
運判官鄜延都總管環慶經略安撫使改鄜延又改
熙河蘭岷路元符中改河東復移鄜延兼知慶州延

安太原府戶部侍郎知河南府神宗謂純粹遇事不苟存心公家旁無顧慮任陝西轉運時當五路大舉財用匱乏吳居厚為京都轉運使上羨餘三百萬緡上遂以賜純粹純粹愀然曰吾部雖窘豈忍取此膏血力辭弗納紹聖元年言者論棄四寨之地實啟戎心司馬光文彥博等主之於內純粹等行之於外後遂入黨籍竄後貶鄂州久之敘官復徽猷閣待制政和七年卒年七十二

范正平字子夷忠宣公次子紹聖初為開封尉戶部尚書蔡京結后戚向氏欲展向氏墳正平爭以為民田不可奪京坐贖銅由此恨之忠宣薨小人附會言正平兄弟撰造永州傳宣聖語及行狀非忠宣意行狀實李之儀受忠宣之意次第之正平遂與之儀俱下御史獄事解猶謫龔州歸終身不仕初忠宣薨特添恩澤分官中外諸孫久之追奪例外官正平遽納其子官全其姓與甥馬方遺表獄作弟正思曰兄是時

方當窀穸其實預議正平獨身當之其後徐丞相處
仁問正平之為人於王寔仲弓仲弓作卓行對一篇
大略謂正平力學為文通古今論議出人意表為宰
相子有聲譽不朋比為進取資不可以勢屈不可以
利回質之神明而不疑行之屋漏而無愧云

范琪字希世文正公之從兄天聖五年進士歷開封府
法曹知鄆縣葺堰埭百餘決導瀦積徙常熟濬金涇
鶴瀆二浦溉田千頃為公家利其在天府議法必精

握節不撓府尹胥安道給事中孫夢得交薦之子師
道有賢名蔣堂敏范氏上世謂琪之高祖隋自唐末
作麗水丞屬亂離遂家於蘇曾祖鈞祖從誼並在錢
忠懿王幙下父昌言歸本朝贈國子博士皆葬吳縣
三讓鄉之天平山云

范師道字貫之天聖九年進士累知廣德縣縣淫祀歲
殺牛以祀神一切禁絕之擢侍御史數以論事忤宰
相劉沆出知常州復召為起居舍人同知諫院會百

官上尊號乃言災異數出而崇尚虛文非所以答天
戒又言宮人多遷除恐女寵因緣以害政事上皆嘉
納之又言陳升之不當進用出知福州復入為三司
鹽鐵副使終直龍圖閣知明州有奏議二十卷文集
五十卷子世京世亮皆登科

范世京字延祖皇祐五年進士歷和州歷陽令適師道
守明州世京棄官侍養曰人子事親之日少事君之
日多寧可曠時失定省父喪扶護歸鄉垢面跣足晝

夜哀號行路為隕涕服除熙寧初官湖北廣南召至京師與時論不合辭歸終祕書丞

范縵唐末吳處士有子七歲能吟詩贈隱者云掃葉隨風便澆花趁日陰處士方干聞之曰此兒他日必垂名又吟夏日詩云閒雲生不雨病葉落非秋干曰惜哉必不享壽果十歲而卒

延賓佳話
唐宋遺史

范周字無外文正公姪孫贊善純古之子負才不羈工詩詞無意榮達安貧自樂未嘗屈折於人所居號范

家園所賦詩甚多時出傑句如詠懷云一瓢有道泰山重五鼎不義鴻毛輕其氣槩肆兀類如此

林處字德祖旦之子好古嗜學擢第累遷朝奉郎太學錄開封府司錄以府尹不之禮移疾告歸不復出仕所居在大雲坊因自號大雲翁屏置朝章不入州縣先達稱其高有大雲集百卷神宗聖訓十卷

朱長文字伯原光祿卿公綽之子公綽居鳳凰鄉集祥里園亭甚古長文擢第號其居曰樂園時俊咸師仰

之號樂圃先生米芾撰墓表略云十九歲登乙科病
足不肯從吏築室樂圃有山林趣著書閱古樂堯舜
道郡守監司莫不造請謀政所急士大夫過者必奔
走樂圃以不見為恥公卿薦以自代者甚衆天子賢
之起為本郡教授又召為太學博士祕書省正字元
符元年卒鄉人立祠於郡庠家徒藏書萬卷天子知
其清特賜其家絹百匹

崇大年字靜之慶歷中擢進士第歷知青田縣民貧無

以納和買大年悉令候冬熟州符督責追杖縣吏大年曰年凶民饑若催督必破產雖杖胥吏三五輩尚可寬一邑之民至冬民無不納足者徙知浦城縣舊設兩棧民以事追去無輕重悉置棧中大年曰此以牛馬役吾民悉命撤去有疾丐分司歸吳日與程光祿諸公觴詠燕遊號吳門十老大年德守淳固志尚夷曠恬於執利不求聞達辭卻薦辟浩然易退吳士自陳君子之奇之後大年繼有賢稱分司後十三年致

仕又十四年卒年八十二樂圃先生朱長文與鄉人
議謚謂黔婁辭國有餘貴辭粟有餘富其謚曰康陶
淵明隱約就閒其謚曰靖節大年當有道之世秉難
進之節韜章蘊能不自表襮仕而知止貧而忘憂凜
然有古高士之風乃共謚曰康靖先生

林希逸史朱
長文行狀

富嚴大中祥符四年進士以刑部郎中守鄉郡嘉祐中
守祕書監致仕未嘗一造官府以耆德稱所居坊人
以德壽目之富氏本出處之青田文忠公弼於嚴為

叔父嚴之祖始居吳葬焉遂為吳人子臨亦有文名
曾孫鈞洵元衡皆登科

郭附字明仲嘉祐八年進士知洪州新建縣俗健訟好
持吏短長附至問民疾苦皆以鷙獸暴橫為言乃檄
旁縣尉併力仍以厚賞啖壯士不閱月得鷙獸數十
尸諸庭乃號於衆曰有悍不率教如此獸者皆殺之
無一人敢犯令以朝奉大夫致仕幅巾策杖窮山林
詩酒之適十八年東南高士皆願從遊卒年八十四

胡稷言字正思則之姓學古文宋景文公以特奏補官
為山陰丞致仕築園鑿池追陶靖節之風種五柳以
名堂清修寡欲延納後進日晡後不飲食客坐蕭然
具湯一杯而已年八十餘子嶧

胡嶧字仲連居五柳松窻蓬戶人以為隱君子步趨言
動皆有尺度賓嘉喪祭率遵古法用杜甫詩名所居
曰如村自號如村老人累舉命官終不仕卒年七十
九詩文簡古如其為人子百能

胡百能字少明紹興十八年進士知江山縣有惠愛乾道初選教諸王宮嚮進用矣以年至力請老朝廷嘉之乃以左奉議郎賜緋衣銀魚致其事歸築堂曰宜休相羊里巷錙銖軒冕殆其天性久之乃卒年七十四子耕

郭元邁字英遠附之孫博通經史入太學魁上舍靖康之難募使北朝通問徽欽二聖元邁上表請行詔以為副使行次河朔以尺紙付家云出疆當艱棘時難

保全生此身已許國矣至北廷上書金帥粘罕乞歸
二聖為金所留尚書洪皓得自北歸首言王倫及元
邁以身徇國棄之不取緩急何以使人

章甫字端叔自建徙居於吳其八世祖本浦城人有西
村珠林二族西村之裔多顯仕珠林至甫曾祖可法
始登科甫熙寧三年進士知壽春縣大臣以孟子解
義進詔付祕書省除太府寺丞召對稱旨除府界提
舉常平事崇寧初除都官郎中陞對抗言元祐臣僚

削秩投荒皆緣國事非為身謀稍稍內徙道路交慶
今復刻名黨籍禁錮子孫恐非陛下本意上優容之
尋掛冠歸吳藏書萬卷讐校精密卒年六十二八子
憲其一也

章憲字叔度居黃村樂道好德操履高潔行有餘力而
以學文鄉里謂之隱君子其學師事王信伯而與朱
子發呂居仁等游尤邃於春秋有復軒集十卷曾文
清公幾為之序

郊亶字正夫崑山太倉農家子自幼知讀書識度不碌碌嘉祐二年進士崑山自國朝來登科者自亶始嘗條吳中水利為書上之熙寧間以亶為司農寺丞奉使浙西措置水利民不以為便遂罷

詳見水利門

終比部郎中子僑子高亦有才鄉里推重謂之郊長官有幼成警悟集行于世

李璋居盤門有不羈之才王荊公甚愛之嘗有詩送璋應舉云湖海青衣二十年尚從鄉試已華顛又送其

下第云學如吾子何憂失命屬天公不可猜璋後改
名玖以累舉補官孫益亦登科紹興間任監察御史
馬友直字伯忠其先本姓司馬氏有名球者仕吳越以
御史中丞為崑山鎮遏使因家焉子孫樂道不仕隨
乎流俗故止稱馬氏聚族居於邑之全吳鄉六直里
以孝義著兄弟六人皆力穡獨友直以儒業自奮入
京師太學元符二年薦春官與李彥方叔游知友直
賢以其兄之子妻之迨宣和水菑全吳之田悉與江


通兄弟皆狼狽營妻子友直獨迎其親徙於邑之進
賢里僦屋以居躬養救水母子晏如也建炎二年以
累舉得官初主湖之武康簿次監潭州南嶽廟尚強
健即挂冠以宣教郎卒年七十六侍郎唐公輝御史
王公葆及我先君少師皆敬愛之孫先覺登紹興庚
辰進士科

閻丘孝終字公顯郡人嘗守黃州蘇文忠公在東坡時
與交從甚密公後經從必訪孝終賦詩為樂孝終既

挂冠與諸名人耆艾為九老會

王蘋字信伯事伊川先生視河南高第楊時猶為後進
時亦以為後來師門成就者惟蘋高宗駐蹕平江郡
守孫佑薦其學行召見上以為通儒賜進士出身除
祕書省正字受詔條具敵退利害蘋奏治本三說一
曰正心誠意二曰辨君子小人三曰消朋黨遷著作
佐郎通判常州蘋識慮精微議論平易頽然若與世
忘不著書既老乃集古今語說為一書未成而卒

黃策字子虛彥之子登科為雍丘主簿元符末詔許中
外言事時昭慈聖獻皇后既復位號典冊有未盡正
者策引古義上書言甚切後以此入黨籍羈管登州
會赦還鄉後除直祕閣自號隨緣居士



吳郡志卷二十六